

Cun la radunanza è turnada la normalitad

La fin d'emna ha l'Uniun chantunala da Musica dal Grischun salvà sia radunanza da delegads a Lantsch. In tema è stà l'influenza da la pandemia sin las uniuns da musica.

GION NUTEGN STGIER/FMR

Be fatschas cuntentas a Lantsch tar la radunanza da delegads da l'uniun che reunescha musicantas e musicants da noss chantun. Da nov a la suprastanza fa part *Ivan Vinzens*. En la cumissiun da musica è vegnì elegì *Remo Derungs*. 100 delegads e delegadas e 20 giasts han chattà la via a Lantsch per assister a la radunanza generala da l'Uniun Chantunala da Musica dal Grischun. Pervia da la pandemia ha l'uniun, che reunescha ils 2700 musicants e musicantas da noss chantun, gi da rennunziar a la radunanza da delegads. Cun la radunanza saja per buna sort er turnada puspè la normalitad, ha ditg *Andy Kolleger*, il president da l'uniun. El saja ventiraivel da pudair beneventar ina uschè gronda raspada. Pleds da bainvegni persunals ha il parsura drizzà ad *Aita Zanetti*, la presidenta dal parlament grischun e lura a cusseglier guvernativ *Jon Domenic Parolini*, il minister da cultura dal Grischun. Preschenta a la radunanza generala è er stada *Luana Menoud-Baldi*, la dunna che stat al timun da l'Associazion Svizra da musica. Cun turnar la normalitad saja er puspè turnada e cunzunt creschida la passiuun per far musica, ha menziunà la dunna.

Recultivar il Grischun e la Svizra

Andy Kolleger ha ditg, che causa la pandemia sajan er ils musicants e las musicantas vegnids sfurzads da star sin distanza. Per els ed ellas in immens culp, sajan musicants e musicantas gist quels che tgiran la collegialitad, l'amicizia, la cumpagnia e la societad. Naginas provas e nagins concerts, ina vaira tagliada en la vita da mintga musicant e musicanta, ha punctuà Kolleger. Il president ha ludà la Confederaziun che saja sa mussada generusa cun la cultura amatura durant la pandemia e sustegnì quella cun 14 milliuns francs. Nagin plaschair haja el lura gi la stigmatizaziun nunggiustificada envers la musica instrumentala. Davart da Berna saja vegnì pretendi che musica instrumentala saja in privel ed ina chausa malsegira per la sanadad. Kolleger ha lura manegià ils suandant: «T'gi vul schon sunar in instrument che periclitateschia la sanadad?» Cultura e far musica sajan betg mo temp liber, in pendant tar il lungurusun ubain in hobi per intellectuals. La cultura saja ina part da l'existenza umana e perquai indispensabla. Ella saja er il levon da la societad. «Nus duvrain ussa ina cultura offensiva



Politica e cultura unida. (da san.) Andy Kolleger, president da l'Uniun Chantunala da Musica dal Grischun, Jon Domenic Parolini, cusseglier guvernativ, Aita Zanetti, presidenta dal Cussegl grond, Simon Willi, president da la vischnanca da Lantsch e Jörg Cadosch, parsura da l'Uniun da musica Lantsch.

FOTOS GION NUTEGN STGIER



Duri Janett (san.), il commember partent da la cumissiun da musica cun ses successur Remo Derungs.



Ivan Vinzens (san.) è da nov commember da la suprastanza da l'uniun e da nov president da la cumissiun da musica e suonda a Reto Mayer.

per recultivar il Grischun e l'entira Svizra», ha accentuà Kolleger. Quai na saja nagin program da salvament, mabain in'acziun per nosa societad. «Igl n'è betg la cultura che dovra nus, mabain nus duvrain la cultura», uschia il president da l'Uniun Chantunala da Musica dal Grischun.

Far musica è ina chausa dal cor

Simon Willi, igl president communal da Lantsch ha ditg che d'esser en in'uniun e da far musica saja per ina vischnanca ina gronda contribuziun a la vita sociala. Aita Zanetti ha manegià che far musica saja ina chausa dal cor. Far musica portia er blera vita en la societad ed ella saja er ina part impurtanta da la cuminanza. Far musica conferma er la multifariadad culturala en tut las regiuns dal Grischun, ha ditg Jon Domenic Parolini en ses pled. Da far musica saja er in pensum da gronda impurtanza per las vischnancas. En la politica mancan lura er na las dissonanzas e savens saja uschia che auters procurian per la musica. Far musica saja lura ina part essenziala da la vita da mintga di, ha ditg il minister da cultura dal Grischun.

Sa retratg suenter diesch onns

Durant in decenni è *Reto Mayer* (Scuol) stà in commember activ da la suprastanza da l'uniun ed in president qualificat da la cumissiun da musica. El è sa retratg da quels uffizis suenter d'avair prestà fitg buna lavur. Per el è vegnì elegì *Ivan Vinzens* (Sursaissa). Il president dal District da musica IV (Surselva) daventa er president da la cumissiun da musica e fa uschia automaticamain er part da la suprastanza da l'Uniun Chantunala da Musica dal Grischun. In um che ha vivì e viva anc adina per la musica è *Duri Janett* (Tschlin). El è sa retratg sco commember da la cumissiun da musica, suenter esser stà fitg activ en quel gremi. Ses plaz surpiglia en la cumissiun da musica *Remo Derungs* (Vignogn). Er el è ina persuna fitg engaschada per la musica ed in um ch'è cun corp ed olma musicant e dirigent. Mayer e Janett e lura er anc *Not Janett* (Silvaplana) sco anteriur suprastant da l'uniun èn da nov commembers d'onur da l'associazion superiura da musicants e musicantas dal Grischun. Organisà l'occurranza ed embelli musicalmain la radunanza ha l'Uniun da musica Lantsch. La proxima radunanza da delegads quella ha lieu il avrigl 2023 a Maiavilla.